



2DA SESSIONE ORDINARIA PÈ U 2016

RIUNIONE DI I 24 È 25 DI NUVEMBRE

N° 2016/O2/067

DUMANDA ORALE SPOSTA DA Mma Mattea CASALTA, Mma Muriel FAGNI è u Sgiò. Paul-André COLOMBANI, François BERNARDI, et François BENEDETTI

Di i gruppi « FEMU A CORSICA » è « CORSICA LIBERA » Membri di a cummissione di e Pulitiche di Salute Publica

OGETTU : Cuefficiente Geograficu d'Insularità.

Da parechje settimane, unepochi di prublemi di salute sò impuntati da i media. L'eletti di a magiutrità territoriale membri di a Cummissione di Salute sò particolarmente mubilizati nantu à l'inseme di e problematiche isulane.

Senza esse esaustivi, si pò ammintà qualchì situazione critica pè i persunali o utilizzatori di salute in Corsica.

À l'Ospidale di Bunifaziu, un conflittu suciale hè natu per via ch'elli ùn anu rimpiazzatu u persunale è per via dinù di a cadasta d'ore in soprapiù. Ci sarà vulsuta tutta a determinazione di u STC per ottene a creazione di parechji posti di persunale di salute.

A settimana scorsa, l'ospidale di Castellucciu hà vistu a so direzione è i so servizii amministrativi bluccati da i persunali stanchi da e suppressione di posti è da i bilanci deficitarii. Isse riduzione buggetarie mettenu in periculu u settore di a salute mentale, parente poveru di l'ospidale.

U territoriu di a piaghja orientale cù a so basca di vita di 25000 abitanti l'inguernu hè l'unicu territoriu à ùn dispone d'un ospidale locale. Un cullettivu di salute chì adunisce eletti d'ogni tendenza, professionali di salute è abitanti di a regione rivendicheghja in più di a creazione d'un ospidale locale :

-U rinforzu di i mezi di u SMUR,

-U prulungamentu di l'auturizzazione di u centru di riadattamentu funzionale

-L'impiantu d'una IRM è d'una casa di salute.

L'inseme di ste situazione palesanu u mancu di mezi è u ritardu d'ecchippamenti in u duminiu di a Salute in Corsica. A ricunniscenza di e specificità in quantu à a Salute deve, di modu urgente traduce si cù una crescita di u cuefficiente geograficu.

Stu cuefficiente geograficu, propiu pocu di più forte ch'è in Isula di Francia, si deve avvicina di ciò chì si face in altri territorii ultra marini cum'è a Riunione o l'Antiglie. Senza una crescita significativa, a Corsica ùn puderà mai ripiglià u so ritardu. Appare quessa cum'è una misura vitale pè u settore di a salute nantu à u nostru territoriu.

Pudemu è duvemu di modu ragiunevule prevede di dumandà una crescita di stu cuefficiente à un livellu di 16%, sapendu ch'ellu hè oghje di 7%.

Chì dispusizione cuntate di piglià o Sgiò Presidente, da chì stu cuefficiente geograficu sia valutatu dinù è adattu in fine à i bisogni di l'isula ?